

II - ARABAKO LURRALDE HISTORIKOAREN TOKI ADMINISTRAZIOA

VITORIA-GASTEIZKO UDALA

EKONOMIA SUSTAPENAREN, ENPLEGUAREN, MERKATARITZAREN ETA TURISMOAREN SAILA

2020an Vitoria-Gasteizko udalerrian ostalaritzaren alorreko enpresa txikiak ezarri eta modernizatzeko laguntza ekonomikoak emateko udal programaren deialdi publikoa eta oinarri arautzaileak

2019ko abenduaren 9an onetsi zituen Tokiko Gobernu Batzarrak Vitoria-Gasteizko Udalaren 2020ko dirulaguntzen deialdiak arautuko dituzten oinarri orokorrak; horien artean, besteak beste, Merkataritza Zerbitzuan, 23. ildoan, "2020an Vitoria-Gasteizko udalerrian ostalaritzaren alorreko enpresa txikiak ezarri eta modernizatzeko laguntzak" izenekoa. 2019ko abenduaren 23ko ALHAOn – 147. zenbakia – argitaratu ziren oinarri orokor horiek, eta udalaren webgunean kontsulta daitezke – www.vitoria-gasteiz.org –, baita herritarrei laguntzeko bulegoetan ere.

2020ko martxoaren 13an egindako bilkuran onetsi zituen Tokiko Gobernu Batzarrak 2020an Vitoria-Gasteizko udalerrian ostalaritzaren alorreko enpresa txikiak ezarri eta modernizatzeko laguntza ekonomikoak emateko udal programaren deialdi publikoa eta oinarri arautzaileak. Era berean, 2020ko ekainaren 5ean egindako bilkuran, alarma-egoera deklaratzeko enpresetan sortutako egoeraren aurrean, eta Ekonomia Sustapenaren, Enpleguaren, Merkataritzaren eta Turismoaren Sailak hala proposatuta, laguntza-deialdi hori arautzen zuten berariazko oinarriak aldatzea onetsi zuen Tokiko Gobernu Batzarrak. Horrenbestez, oinarri horiek argitara ematen dira, herritarrek jakinaren gainean egon daitezzen:

1. oinarria. Dirulaguntzen ildoak

Ostalaritzako enpresa txikiak ezartzeko eta modernizatzeko laguntzak.

2. oinarria. Deialdiaren xedea

– Vitoria-Gasteizko udalerrian ostalaritza-enpresa txikiak ezartzeko nahiz halakoak eraberritu edo modernizatzeko laguntza ekonomikoak emateko baldintzak arautzea dute xede oinarri hauek – norgehiagoka baliatuko da horretarako –.

– Itzuli beharrik gabeko dirulaguntzak izango dira laguntza ekonomiko horiek.

3. oinarria. Enpresa eta pertsona onuradunen betebeharrak

Merkataritza-jardueraren bat duten pertsona fisiko nahiz juridikoak izan ahalko dira oinarri hauetan arautzen diren laguntzen onuradun, baldintza hauek betetzen dituztelarik – dirulaguntza-eskabidea egiten duten unetik –:

1. 50 langile baino gutxiago izatea.
2. Urteko negozio-bolumena edo balantze orokorra 10 milioi eurotik gorakoa ez izatea.
3. Aurreko baldintzak betetzen ez dituzten enpresek ehuneko 25etik gorako partaidetza edo lotura ez izatea bertan.
4. Ekonomia Jardueren gaineko Zergan alta emanda egon beharko du enpresak, eta eskabidean adierazten den lokalean merkataritza-jarduera eduki, behintzat dirulaguntza eskatzen duenetik.

Enpresaren jarduera nagusia Ekonomia Jardueren gaineko Zergaren multzo edo epigrafe hauetakoren batekoa izatea:

671, 672 eta 673: Elikadura-zerbitzua, jatetxe, kafetegi eta tabernetan.

676: Elikadura-zerbitzua txokolategi, izozki-denda eta hortxata-dendetan.

677.9: Jatetxeei dagozkien beste elikadura-zerbitzu batzuk.

681, 682, 683 eta 684: Ostatu-zerbitzuak, hotel, motel, pentsio, ostatu, apopilo-etxe eta apartamentu-hoteletan.

5. Aurreko puntuan adierazitakoa gorabehera, ez zaie dirulaguntzarik emango ekonomia-jarduera bakarra asteburuetako gaueko ostalaritza duten enpresei, salbu eta egiten diren inbertsioen helburua gaueko ostalaritza-jarduera eguneko ostalaritza-jarduera bihurtzea bada. Era berean, ez zaie dirulaguntzarik emango beren jarduera kolektibitateei catering-zerbitzuak eskaintzea duten enpresei.

Bi betebeharrak horiek ofizioz egiaztatu ahal izango ditu udalak, behar diren ikuskapenak eginez, establezimenduetan.

6. Ekonomia Jardueren gaineko Zergaren bi epigrafe edo gehiagotan alta emanda badago enpresa, onuraduntzat joko da baldin eta jarduera nagusia diruz lagundu daitezkeen multzo edo epigrafe baten barruan badago eta egiten dituen ekintzak jarduera horri badagozkie. Ekonomia Jardueren gaineko Zergan adierazitako azalaren banaketa kontuan hartuz zehaztuko da jarduera nagusia, hau da, azalera erabilgarririk handiena duen hura joko da jarduera nagusitzat.

7. Vitoria-Gasteizko udalerrian kokatuta egon beharko du negozioaren lokalak —menpeko toki-erakundeak barne—, industrialdeetan izan ezik. Ez da beharrezkoa izango eskabidea egiten duten pertsona edo entitateek helbidea Vitoria-Gasteizko udalerrian edukitzea.

8. Lur-arrasean kokatuta egon beharko du lokalak, eta jendearentzat irekita egon. Azoketako nahiz merkataritza-zentro edo -galeria pribatueta eskabidea ere aintzat hartu ahal izango dira. Ez dira finantzatu zerbitzuguneetan —gasolindegietan— kokatutako establezimenduak.

9. Betebeharrak fiskalak, Gizarte Segurantzarekikoak, Aldundiarekikoak eta Vitoria-Gasteizko Udalarekikoak beteta edukitzea. Eskabidea aurkezten denean ez ezik, dirulaguntza-eskabidea tramitatzeko prozesu osoan ere bete beharko da betebeharrak hori —dirulaguntza ematen, obligazioa onartzen nahiz ordaintzen denean—.

10. Enpresa eskatzaileek estu-estu bete beharko dute indarrean dagoen araudia, bai hirigintzari eta arkitekturari dagokionez, bai osasunari eta higieneri dagokionez. Ofizioz egiaztatuko da enpresa eskatzaileak arauko obra-baimena duen, edo, bestela, behar bezala izapidetu duen dagokion erantzukizunpeko aitortpena. Lau hilabeteko epean, obra bukatzen denetik, horren benetako kostuari buruzko aitortpena aurkeztu beharko du enpresak Zerga Ikuskaritzaren Zerbitzuan, eta eraikuntza, instalazio eta obren gaineko zergaren likidazioa eskatu.

11. Nolanahi ere, baztertuta geratzen dira sozietate publikoak eta zuzenbide publikoko entitateak, baita irabazi-asmorik gabeko entitateak eta elkarte- edo lanbide-jarduerak egiten dituztenak ere (elkartek, lanbide-elkargoak eta abar).

12. 2019ko deialdian lokal beragatik lerro honetako laguntzarik jaso gabea izan beharko du eskabidea egiten duen enpresak.

4. oinarria. Diruz lagundu daitezkeen ekintzak

Dirulaguntzaren xede den lokalean 2019ko ekainaren 7tik 2020ko uztailaren 17ra bitartean egiten diren inbertsio-proiektuek jaso ditzakete dirulaguntzak.

Behar bezala jaulkitako fakturen bitartez egiaztatu beharko dira egindako inbertsioak, gorago adierazitako datetan, eta horien ordainketa, berriz, Vitoria-Gasteizko Udalari dagozkien ordainagiriak aurkeztuz (ikus 15. oinarria), 2020ko irailaren 17ra bitartean (egun hori barne). Adierazitako epean fakturen ordainketaren ziurtagirien bitartez —osorik edo partez— ordaindu dela behar bezala egiaztatzen den zenbatekoa bakarrik joko da diruz laguntzeko modukotzat, nahiz eta fakturan ageri den kostua handiagoa izan.

Laguntza-lerro horretan, jarduketa hauetarako jaso ahal izango da dirulaguntza:

— Eraberritze-obrak: ostalaritza-establezimendua egokitu, berritu edo handitzeko egiten diren obrak oro, eta jarduera abian jarri edo merkataritza-establezimendua eraberritzeko aurre-proiektu edo proiektu teknikoak kontratatzea. Atal honetan dirulaguntza jaso dezaketen jarduketak baloratzeko orduan, obra-lizentziaren eskabidearekin edo obraren erantzukizunpeko adierazpenarekin batera aurkeztutako dokumentazioa kontuan hartu ahal izango da, edo eraikuntza, instalazio eta obren gaineko zergaren likidaziorako aurkeztutakoa.

Atal honetan dirulaguntza jaso dezaketen jarduerak baloratzeko orduan, obra-lizentziaren eskabidearekin batera aurkeztutako dokumentazioa hartuko da kontuan, edo azken likidaziorako aurkeztutakoa.

— Lokalaren ekipamendua: aktibo finko berriko elementuetan egindako inbertsioak:

Jarduera nagusiarekin zuzeneko zerikusia duen makineria.

Jarduerari lotutako altzariak.

Segurtasun-ekipoak.

Erosten diren egunetik —fakturan ageri den datatik— gutxienez bi urtez eduki beharko dira enpresan aktibo horiek.

Diruz lagundu daitekeen jarduerak establezimenduan izango duen metro koadro erabilgarri bakoitzeko gutxienez 150,00 eurokoa izan beharko du diruz lagundu daitekeen inbertsioak.

Jardueraren edo eraberritzearen proiektu teknikoan ageri den azalera erabilgarria aintzat hartuta zehaztuko da diruz lagundu daitekeen jarduerak izango duen azalera erabilgarria, biltegia eta komunak bazter utzita. Lokalean hainbat jarduera burutzen badira —batzuk diruz lagundu daitezkeenak eta besteak ez—, zuzenean diruz lagundu ezin diren jarduera horiei egotzi beharrekoak kendu egingo dira aurreko azaleratik. Jarduera- edo eraberritze-proiektu teknikorik aurkezten ez bada, edo bertan azalaren banaketa argi eta garbi ageri ez bada, diruz lagundu daitezkeen jarduerari lotuta Ekonomia Jardueren gaineko Zergan ageri den azalera hartuko da kontuan, biltegi gisa baliatuko den azalera alde batera utzita, datu hori ageri bada.

5. oinarria. Dirulaguntzaren xede izango ez direnak

— Erakusteko eta probetarako artikulua eta gerora salgai jar daitezkeen artikulua.

— Garraio-kostuak, aseguruak, administrazioaren baimen, lizentzia eta antzekoengatik ordaindu beharreko tasak, edo bestelako zergak.

— Garraio-elementuak, telebistak edo telefono-terminalak erostea, eta terraza edo mahai-txoetan, kaleko mahaietarako altzarietan, aire girotuan, errotuluetan, olanetan eta pertsianetan egindako inbertsioak.

— Lokala erostea, eskualdatze-eskubideak, alokairu-errentak eta frankizietan sartzeko kanonak.

— Piezak mantendu, konpondu edo aldatzeko gastuak.

— Bulegoko materialari, tresnei, ontziteriari, mahai-tresnei eta antzekoei dagozkien gastuak.

— Finantza-errentamendu edo antzeko formulen bidez egindako inbertsioak.

– Ale bakoitzeko zenbateko garbia 50,00 eurotik beherakoa den edozein aktibo edo material erostea.

– “Lokalaren ekipamendua” zerrendan berariaz dirulaguntzari egotz dakioken gastu gisa ageri ez den beste edozein aktibo erostea.

– Diruz lagundu daitekeen edozein kontzeptu, baldin eta hornitzaileak dirulaguntza eskatzen duen enpresarekin lotura badu. “Lotura duen enpresa” kontzeptuari dagokionez, Sozietateen gaineko Zergaren abenduaren 13ko 37/2013 Foru Arauaren 42.3 artikuluko definizioa aintzat hartuko da.

6. oinarria. Baliabide ekonomikoak

2020ko ekitaldiko udal-aurrekontuetako 2020/08 22 4314.4.8964 “Denda txikientzako laguntzak” partidaren kontura finantzatuko dira deialdi honetan aurreikusten diren dirulaguntzak. 125.000,00 eurokoa da partidaren zuzkidura.

Ekonomia Sustapenaren, Enpleguaren, Merkataritzaren eta Turismoaren Saileko zinegotzi ordezkararen erabakia dela medio zuzkidura hori handitzerik izango da, baldin eta krediturik badago.

7. oinarria. Indarrean jartzea eta eskabideak aurkeztea

ALHAOn argitaratzen diren egunaren biharamunean jarriko dira indarrean oinarri hauek —aldez aurretik Dirulaguntzen Datu-base Nazionalen laburpen-iragarkia argitaratuko da—.

Eskabideak aurkezteko epea 2020ko uztailaren 1ean hasiko da, eta uztailaren 17an bukatuko.

Deialdi honetako 3. oinarrian adierazitako baldintzak betetzen dituen enpresa onuradunak laguntza-eskabide bana aurkeztu beharko du berritze- edo egokitze-lanak egin dituen lokaletako bakoitzeko. Lokal bakoitzeko laguntza bakarra eskatu ahal izango da urtean.

8. oinarria. Dirulaguntzak emateko prozedura

Ekonomia Sustapenaren, Enpleguaren, Merkataritzaren eta Turismoaren Sailari dagokio oinarri hauetan arautzen diren laguntzak kudeatzea. Hautatze- eta jarraipen-batzorde bat eratu da horretarako, Ekonomia Sustapenaren, Enpleguaren, Merkataritzaren eta Turismoaren Saileko zuzendariak, Enpresen Zerbitzuko buruak eta Merkataritza Zerbitzuko buruak osatua, zein arduratuko baita aurkeztutako eskabideak aztertu eta ebaluatzeaz, Merkataritza Zerbitzuko teknikariek txostena egin ondoren.

Norgehiagoka baliatuko da laguntzak emateko prozedura gisa, eta, hortaz, aurkezten diren proiektuen arteko alderaketa egingo da.

Ekonomia Sustapenaren, Enpleguaren, Merkataritzaren eta Turismoaren Saileko zinegotzi ordezkararen ebazpenaren bidez eman edo ukatuko dira laguntzak, hautatze- eta jarraipen-batzordeak proposamena aurkeztu ondoren.

9. oinarria. Ebatzi eta jakinarazteko epea

Gehienez sei hilabeteko epean ebatziko da prozedura, deialdia ALHAOn argitaratzen dene-tik kontatuta. Epe hori berariazko ebazpenik eman gabe igaroz gero, dirulaguntza eskuratzeko eskabidea ezetsizat joko da.

ALHAOren eta Vitoria-Gasteizko Udalaren iragarki taularen bidez egingo dira dirulaguntzak emateko edo ukatzeko ebazpenaren jakinarazpenak, betiere Datu pertsonalak babesteari eta eskubide digitalak bermatzeari buruzko abenduaren 5eko 3/2018 Lege Organikoari jarraituz.

Dirulaguntzak emateko nahiz ezesteko erabakiak administrazio-bidea agortuko du, eta horren kontra administrazioarekiko auzi-errekurtsoa aurkeztu ahal izango da zuzenean Vitoria-Gasteizko Administrazioarekiko Auzietarako Epaitegian, bi hilabeteko epean, ALHAOn argitaratzen den egunaren biharamunetik, edo, aukeran, berraztertze-errekurtsoa, erabakia hartu duen

organoari zuzenduta, hilabeteko epean, ALHAOn argitaratzen den egunaren biharamunetik; horren berriazko nahiz ustezko ebazpenaren kontra, berriz, bi hilabeteko epean aurkeztu ahal izango da administrazioarekiko auzi-errekurtsoa, Vitoria-Gasteizko Administrazioarekiko Auzietarako Epaitegian, errekurtsoa ezesten duen ebazpenaren berri jasotzen den egunaren biharamunetik, edo, ebazpena ustezkoa bada, sei hilabeteko epean, ustezko ebazpen hori gertatzen den egunaren biharamunetik.

10. oinarria. Balioespen-irizpideak

1. II. eranskinean zehazten diren auzoetan kokatutako inbertsio-proiektua (Alde Zaharra, Angloa, Koroatzea, Lovaina, Pilar eta Zabalgunea): 30 puntu.

2. Enpresa eskatzailearen antzintasuna (Ekonomia Jardueren gaineko Zergako datuen arabera): 25 puntu arte.

— 10 urtetik gorako antzintasuna: 15 puntu.

— 20 urtetik gorako antzintasuna: 25 puntu.

Oro har, enpresa eskatzaileak diruz lagun daitekeen jarduera ekonomiko bera gauzatzen Vitoria-Gasteizko udalerriko merkataritza-lokalen batean etenik gabe emandako denbora balioetsiko da antzintasun gisa.

Jarduera Vitoria-Gasteizen kokatutako lokal batetik beste batera aldatu bada, enpresa edo pertsona eskatzaileak Ekonomia Jardueren gaineko Zergan —hasierako lokalean— duen antzintasuna hartu ahal izango da kontuan, baldin eta jarduerak etenik izan ez badu.

Enpresa eskualdatu bada, lehenago zegoen enpresaren antzintasuna kontuan hartu ahal izango da, baldin eta eskualdatzea behar bezala justifikatzen bada eta hasierako enpresaren jarduerari eutsi bazaio.

Enpresa eskatzailearen forma juridikoa aldatu bada, hasierako enpresaren antzintasuna kontuan hartu ahal izango da, baldin eta enpresa edo pertsona eskatzaileak gutxienez ehuneko 33,3ko partaidetza egiaztatzen badu, enpresa batean nahiz bestean.

3. Diruz lagundu daitekeen inbertsioaren zenbatekoa: 15 puntu arte.

— Diruz lagundu daitekeen inbertsioa —jardueraren metro koadro erabilgarriko— 150,00 eurotik 250,00era bitartekoa bada: 0 puntu.

— Diruz lagundu daitekeen inbertsioa —jardueraren metro koadro erabilgarriko— 251,00 eurotik 350,00era bitartekoa bada: 5 puntu.

— Diruz lagundu daitekeen inbertsioa —jardueraren metro koadro erabilgarriko— 351,00 eurotik gorakoa bada: 15 puntu.

4. 10 langile baino gutxiago dituzten enpresak (langileen azken hilabeteko TC2 agirien edo zerrenda izendunaren arabera): 10 puntu arte.

— 5 langile baino gutxiago: 10 puntu.

— 5 eta 9 langile artean: 5 puntu.

5. Merkataritza-sozietateen partaidetzarik ez duten enpresak (eratzte-eskrituren nahiz geroko aldakuntza-eskrituren arabera): 5 puntu.

6. Merkataritza-lokalean jendea euskaraz edo beste hizkuntzaren batean (ingelesa, frantsesa) hartzeko aukera: 5 puntu arte.

Enpresak aurkezten dituen ziurtagiri edo titulu ofizialen arabera balioetsiko da:

— Bai Euskarari edo Bikain ziurtagiria dutela egiaztatzen duten enpresak: 5 puntu.

– Hizkuntzetarako Europako Erreferentzia Esparru Bateratuko B1 mailaren edo goragokoaren baliokide den titulu edo ziurtagiri ofiziala —euskara, ingelesa edo frantsesa— duen langilerik badutela egiaztatzen duten enpresak: 2,5 puntu hizkuntza bakoitzeko.

7. Irisgarritasun-hobekuntzak (proiektu teknikoaren edo txostenaren arabera): 5 puntu.

8. Aurkeztutako oroitidazkiaren kalitatea, III. eranskinaren arabera: 5 puntu arte.

– Enpresaren, jardueraren eta merkataritza-lokalaren deskribapena: 1,5 puntu arte.

– Inbertsio-proiektuaren deskribapen kualitatiboa: 2 puntu arte.

– Inbertsio-proiektuaren deskribapen kuantitatiboa: 1,5 puntu arte.

11. oinarria. Proiektuak balioestea eta dirulaguntza kalkulatzea

Aurkeztutako proiektuen balioespena egingo da, 10. oinarrian adierazitako irizpideen arabera.

Guztira 100 puntu jasotzen duten proiektuek diruz lagun daitekeen inbertsioaren ehuneko 40ra arteko dirulaguntza lortu ahal izango dute. Aitzitik, guztira 0 puntu lortzen dutenek ehuneko 25era arteko dirulaguntza lortu ahal izango dute. Puntuaziorik handienaren eta gutxienekoaren arteko gainerako proiektuei proportzio lineala aplikatuko zaie dirulaguntzaren portzentajea kalkulatzeko, balorazioan lortutako puntu bakoitzeko ehuneko 0,15 osagarria gehituz.

Enpresa bakoitzari dagokion gehieneko laguntza kalkulatzeko, proiektuaren kokalekua aintzat hartuko da. Hain zuzen ere, hauek izango dira dirulaguntzaren gehieneko kopuruak:

– 120,00 euro, jardueraren azalera erabilgarriaren metro koadro bakoitzeko, auzo hauetan kokatutako proiektuen kasuan: Alde Zaharra, Koroatzea, Angloa, Pilar, Zabalgunea eta Lovaina (II. eranskina).

Dirulaguntza ezingo da izan 10.000,00 eurotik gorakoa, inolaz ere.

– 80,00 euro, jardueraren azalera erabilgarriaren metro koadroko, II. eranskinean adierazten direnez bestetan kokatutako proiektuak direlarik.

Dirulaguntza ezingo da izan 7.000,00 eurotik gorakoa, inolaz ere.

Dirulaguntza jasotzen duen jardueraren azalera erabilgarria deialdi honetako 4. oinarrian xedatutakoaren arabera zehaztuko da.

Hamargarren oinarrian adierazten diren irizpideak aintzat harturik balioesten direlarik guztira lortzen dituzten puntuazioen arabera ordenatuko dira dirulaguntza jaso lezaketen proiektuak.

Guztira lortutako puntuazioaren arabera ezartzen den hurrenkera horri jarraiki emango dira dirulaguntzak, harik eta erabilgarri dagoen aurrekontu-kreditua agortu arte. Berdinketa egokituz gero, eta puntuazio bera duten eskabide guztiei erantzuteko aski aurrekontu-krediturik ez badago, 10. oinarriko 2. atalean lortutako puntuazioa hartuko da aintzat bata edo bestea lehenesteko —II. eranskinean jasota dauden auzoetan kokatutako inbertsio-proiektua—. Berdinketak jarraituz gero, 10. oinarriko 3. atalean —enpresa eskatzailearen antzintasuna— lortutako puntuazioa hartuko da aintzat. Azkenik, berdinketak jarraituz gero, diruz lagundu daitekeen jardueraren metro koadro erabilgarri bakoitzeko inbertsio-ratiorik handiena duen eskabideari emango zaio lehentasuna. Baldin eta geratzen den saldoa ez bada aski baliagarri dagoen kreditua agortzen duen dirulaguntza ordaintzeko, geratzen den kreditua ordainduko zaio horri.

12. oinarria. Ordaintzeko modua

Dena batera ordainduko da laguntza, deialdia ebatzi ondoren, eta 15. oinarrian adierazitako moduan justifikatu ondoren.

13. oinarria. Pertsona edo enpresa onuradunen betebeharrak

Laguntza jasotzen duten enpresa edo pertsonak betebeharrak hauek izango dituzte:

1. Udalaren egiaztatze-ekintzen mende jartzea, baita bertako Kontu-hartzaitza Nagusiari dagozkion finantza-kontrolerako ekintzen eta Herri Kontuen Euskal Epaitegiaren arauetan aurreikusitako mende ere.

2. Udal laguntza honetarako aurkeztutako gastu beretarako bestelako dirulaguntza edo laguntzarik jasoz gero, Udalari jakinaraztea. Vitoria-Gasteizko Udalak emandako dirulaguntzari uko egiteko eskabidea aurkeztu beharko du enpresa onuradunak 10 egun balioduneko epean, beste administrazioak dirulaguntza ematen dioneko ebazpena jakinarazten dion egunaren biharamunetik.

3. Dirulaguntza emateko orduan kontuan izandako edozein zirkunstantzia objektibo nahiz subjektibo aldatuz gero, udalari jakinaraztea.

4. Laguntza-eskabidea ulertu eta ebaluatzeko beharrezkotzat jotzen den informazio eta agiri osagarri oro Ekonomia Sustapenaren, Enpleguaren, Merkataritzaren eta Turismoaren Sailaren eskura jartzea.

5. Dirulaguntza eman ondoren, norako eman den, establezimendu horretan bideratzea jarduera ekonomikoa gutxienez bi urtez. Adierazitako epe hori igaro aurretik ixten bada establezimendua, enpresa onuradunak jakinarazi egin beharko dio udalari, eta emandako dirulaguntzaren zati bat itzuli, jarduera bertan behera geratzen den egunetik bi urteko epe hori (dirulaguntza eman zen egunetik) betetzeko falta den denboraren proportzio berean. Salbuespen gisa, ez da eskatuko jaso den dirulaguntza itzultzeko, eman zenetik bi urte igaro ez badira ere, jabeak gaixotasun larria duelako edo hil egin delako ixten bada negozioa.

Jarduera Vitoria-Gasteizko udalerrian kokatutako beste lokal batera aldatzen bada, baloratu egingo da jardueraren lokal berrian diruz lagundutako inbertsioei eusten zaien, eta jarduera leku aldatzen den egunean bi urteko iraunaldia osatzeko falta den denbora-tartea —dirulaguntza eman zen egunetik— kontuan hartuko da. Irizpide horiek oinarritzat harturik, enpresa onuradunak itzuli beharko duen dirulaguntzaren zati proportzionala kalkulatu da.

14. oinarria. Bestelako laguntza eta diru-laguntzekiko bateraezintasuna

Programa honetan aurreikusten diren laguntzak ezingo zaizkio gehitu gastu beretarako bestelako laguntzei.

15. oinarria. Nahitaezko agiriak

Agiri hauek erantsi beharko zaizkie dirulaguntza-eskabideei:

- Eskabide-orria eta zinpeko aitortpena (l. eranskina).
- Pertsona fisikoen kasuan: nortasun-agiriaren fotokopia.
- Pertsona juridikoek, honako hauen kopiak:

IFZ.

Enpresaren eratze-eskriturak nahiz geroko aldakuntza-eskriturak, enpresaren ordezkariari eta helbide sozialari eragiten dietelarik.

Ordezkaritza-ahalmenak.

Ordezkaritza-ahalmena duen pertsonaren nortasun-agiria.

— Soldatapeko langilerik ez badu, azken hilabeteko autonomo-ordainketaren ordainagiria eta enpresaburuaren jarduera-ezaren egiaztagiria.

— Soldatapeko langilerik badu: TC2 edo azken hilabeteko langileen zerrenda izenduna.

- Oroitidazkia, III. eranskinaren arabera: proiektuaren oroitidazki kualitatiboa eta fakturen zerrenda.
- Establezimenduari dagokion jabetza-agiri edo alokairu-kontratuaren kopia. Lokala alokatzeko kontratuan berariaz adierazten ez bada, eraberritze-obra egiteko baimena, errentatzaileak emana.
- Halakorik izanez gero, kontratatutako proiektu teknikoaren kopia, non lokalaren azalaren banaketa islatzen den.
- Halakorik izanez gero, Bai Euskarari ziurtagiriaren kopia edo Bikain ziurtagiria lortu izana argitaratu zen EHAren orriaren kopia, halakorik izanez gero.
- Enpresako langileek halakorik izanez gero, Hizkuntzetarako Europako Erreferentzia Esparru Bateratuko B1 mailaren edo goragokoaren baliokide den titulu edo ziurtagiri ofiziala.
- Fakturen kopiak.
- Fakturen ordainketaren egiaztagiriak: ez da dirutan egindako ordainketen egiaztagiririk onartuko —ezta enpresa hornitzaileen kobrantza-egiaztagiririk ere—, salbu eta hornitzaile beraren faktura bat edo faktura multzo bat bada, guztira 2.500,00 eurotik beherakoa, eta haietan ordaintzeko beste modurik adierazten ez bada.

Gainerako kasuetan, ordainketaren banku-egiaztagiriak aurkeztu beharko dira. Ez da onartuko enpresa eskatzaileak hornitzaileari faktura ordaindu diola argi eta garbi gera dadin nahikoa daturik jasotzen ez duen banku-egiaztagiririk. Era berean, ez dira egiaztagiri gisa onartuko internet bidez eskuratutakoak, banku-erakundeak balioztatuta edo zigilatuta ez badaude.

Ordainketa-egiaztagiriak aurkezteko epea 2020ko irailaren 17an bukatuko da.

Vitoria-Gasteizko Udalarekiko zerga-betebeharrak betetzeari dagokionez, ofizios begiratu da persona edo enpresa eskatzailea egunean dagoen, baita arauzko obra-baimenak dituen ere.

Eskabidea aurkezteak Vitoria-Gasteizko Udalarari zerga-betebeharrak eta Gizarte Segurantzarekikoak betetzeari buruzko ziurtagiriak zuzenean eskatzeko baimena ematea dakar berekin (I. eranskina). Hala ere, enpresa eskatzaileak berariaz ukatu ahal izango du baimen hori. Horrela bada, Arabako Foru Aldundiarekiko eta Gizarte Segurantzaren Diruzaintza Nagusiarekiko betebeharrak ordainduak dituela egiaztatzen duen ziurtagiria aurkeztu beharko du.

16. oinarria. Akatsak zuzentzea

Dirulaguntza-eskabideari ez bazaizkio deialdian galdatutako agiriak eransten, hamar eguneko epea emango zaie eskatzaileei falta zaizkien agiriak aurkezteko —Administrazio Publikoen Administrazio Prozedura Erkidearen urriaren 1eko 39/2015 Legearen 68. artikulua ildotik—, eta halaber ohartaraziko hala egin ezean eskabidea bertan behera utzitzat joko dela.

17. oinarria. Datu pertsonalen tratamendua

Datu Pertsonalak Babesteari eta Eskubide Digitalak Bermatzeari buruzko abenduaren 5eko 3/2018 Legea Organikoan xedatutakoaren arabera egingo da datu pertsonalen tratamendua, orobat aintzat hartuz Europako Parlamentuaren eta Kontseiluaren 2016ko apirilaren 27ko 2016/679 Araudia, datuen tratamenduari eta datu horien zirkulazio libreari dagokionez pertsona fisikoak babesteari buruzkoa.

Vitoria-Gasteizen, 2020ko ekainaren 8an


Administrazio Zerbitzuko burua
LUCIO CRUCELEGUI Y JÁUREGUI

I. eranskina: laguntza-eskabidea eta zinpeko aitortpena

<https://www.vitoria-gasteiz.org/docs/wb021/contenidosEstaticos/adjuntos/eu/00/51/60051.pdf>

II. ERANSKINA: ANGLOA, ALDE ZAHARRA, KOROATZEA, LOVAINA, PILAR ETA ZABALGUNEA.

Auzo hauetako kaleen plano orientagarria: Angloa, Alde Zaharra, Koroatzea, Lovaina, Pilar eta Zabalgunea.



Aipatutako auzo horietako kaleak eta zenbakiak esteka honetan <http://www.vitoria-gasteiz.org/wd004/docs/es/tramos.xls> kontsulta daiteke zehaztasun handiagoz:

III. eranskina: oroitidazkia

– Proiektuaren oroitidazki kualitatiboa.

<https://www.vitoria-gasteiz.org/docs/wb021/contenidosEstaticos/adjuntos/es/76/17/87617.pdf>

– Proiektuaren deskribapen kuantitatiboa.

<https://www.vitoria-gasteiz.org/docs/wb021/contenidosEstaticos/adjuntos/es/76/18/87618.pdf>